

共同經課 - 1 出埃及記三十三章十二節~二十三節

12 摩西對耶和華講：「看啊，你對我講：『將此個百姓導上去』，總是無互我知你欲差是誰及我相及去，只有講：『我用名揀召你，你佇我的面前也得著恩典。』」13 我今若佇你的面前得著恩典，求你將你的路指示我，互我識你，通佇你的面前得著恩典。你著數念此族是你的百姓。」14 耶和華講：「我欲親身及你去，互你平安。」15 摩西對伊講：「你若無親身及我去，就毋通導阮對遮上去。16 對怎樣會知我及你的百姓佇你的面前得著恩典？豈毋是對你及阮相及去、互我及你的百姓佇地上萬百姓有分別嗎？」17 耶和華對摩西講：「你所講此個事我也欲做伊；因為你佇我的面前得著恩典，閣我用名揀召你。」18 伊講：「求你互我看見你的榮光。」19 伊講：「我欲互我一切的恩惠，經過你的面前，也宣佈耶和華的名，佇你的面前。我欲施恩佇我所施恩者；我欲憐憫佇我所憐憫者。」20 閣講：「你袂會看我的面，因為無人會看見我也會活。」21 耶和華講：「看啊，近我遮有所在，你著倚佇石磐頂。22 當我的榮光經過的時，我欲給你下佇石磐縫內，用我的手遮你，聽候我過去，23 然後我欲勾我的手倒轉，你就會看見我的尻脊後，總是袂得通看見我的面。」

共同經課 - 2 詩篇九十九篇

1 耶和華做王；列邦著愕愕！伊坐佇基路兵，地著搖動。2 耶和華佇錫安做大；伊搬(pôaⁿ)過佇萬百姓的頂面。3 in 著謳唵你大閣通驚畏的名；伊是至聖！4 王有氣力，歡喜公平，你互正直堅固，佇雅各中行公平及義理。5 恁著尊重耶和華——咱的上帝，佇伊腳踏椅的頭前跪拜。伊是至聖！6 佇伊的祭司中有摩西及亞倫；佇求叫伊的名的的人的中間有撒母耳。in 求叫耶和華，伊就聽 in。7 伊佇雲柱的中間對 in 講話；in 遵守伊干證的話及伊所賞賜 in 的律法。8 耶和華——阮的上帝啊，你有應 in；你雖然照 in 的所行報應 in，猶久你是赦免 in 的上帝。9 恁著尊重耶和華——咱的上帝，佇伊的聖山跪拜，因為咱的上帝——耶和華是至聖！

共同經課 - 3 帖撒羅尼迦前書一章一節~十節

1 保羅、及西拉，以及提摩太批寄互帖撒羅尼迦人的教會，就是惦佇父上帝及主耶穌基督的。願恁得著恩典、平安！2 阮為著恁眾人常常感謝上帝，佇祈禱的中間數念恁，3 佇上帝咱的父的面前，長長數念恁有信就行做，有仁愛就著磨，有向望咱的主耶穌基督就吞悞。4 上帝所疼的兄弟啊，阮知恁的受揀選；5 因為阮的福音到佇恁，毋是在佇講話若定，是在佇權能在佇聖神，及堅固的信，親像恁知阮佇恁中間，為著恁來成做甚麼等號的人。6 閣恁已經佇多多苦難，用聖神所賞賜的歡喜，來承受道理，就學阮也學主；7 致到恁做馬其頓、亞該亞攏總信的人的模樣。8 因為主的道理對恁傳出。毋若佇馬其頓及亞該亞若定，就是恁向上帝的信已經逐所在報揚；致到阮毋免講甚麼。9 因為 in 家已報明講阮到恁中間是甚麼款，也恁怎樣有離開偶像，歸佇上帝，來服事活閣真的上帝，10 也聽候伊的子對天落來，就是伊對死人中互伊復活的耶穌——是彼個拯救咱出將來的受氣者。

共同經課 - 4 馬太福音二十二章十五節~二十二節

15 彼時，法利賽人去參詳，看通怎樣就伊的話來罩伊，16 就差 in 的學生及希律黨就近伊，講：「先生啊，阮知你是真實，閣用真實將上帝的路教示人，你也無掠甚麼人做要緊，因為你無看人的外貌。17 納稅互該撒合宜抑無？你拍算怎樣？請給阮講。」18 耶穌知 in 的歹，就講：「假好的人啊，啥事試我？19 用納稅的銀仔互我看！」in 就提一個銀仔互伊。20 耶穌給 in 講：「此個像及號是是誰？」21 給伊講：「該撒。」伊就給 in 講：「按呢，恁著將該撒的物納互該撒；將上帝的物納互上帝。」22 in 聽見就奇怪，離開伊去。